



Na osnovu člana 52. stav (9) Zakona o porezu na dodatu vrijednost („Službeni glasnik BiH“, br. 9/05, 35/05 i 100/08) i člana 15. stav (1) Zakona o Upravi za indirektno oporezivanje („Službeni glasnik BiH“, broj 89/05), direktor Uprave za indirektno oporezivanje, **donosi**

**Uputstvo o izmjeni i dopunama Uputstva
o postupku povrata poreza na dodatu vrijednost i
odobranju poreznog kredita po osnovu podnošenja PDV prijave**

Član 1.
(Predmet)

U Uputstvu o postupku povrata poreza na dodatu vrijednost i odobranju poreznog kredita po osnovu podnošenja PDV prijave („Službeni glasnik BiH“, broj 96/09), u članu 9. stav (2) mijenja se i glasi:

„(2) Ispitni postupak iz stava (1) ovog člana vrši se prioriteto na osnovu dostupnih podataka, uz pomoć IS UINO, kao i dodatnih provjera zahtijevanog povrata odnosno kredita koji se sastoji u utvrđivanju sljedećih činjenica:

- a) da li se radi o poreznom obvezniku koji je stalno u poreznom kreditu, a isti ne koristi za namirenje obaveza, te mu se isti vrati kao neiskorišteni porezni kredit;
- b) da li posljednja PDV prijava odstupa od prethodno podnesenih prijava;
- c) da li porezni obveznik u roku od tri mjeseca (perioda) od okončanja kontrole prikazuje povrat ili kredit veći od prosjeka prijava u koji je uključena i prijava po kontroli;
- d) da li je porezni obveznik kontroliran, a u prethodnih 12 mjeseci je dobio povrat u ukupnom iznosu većem od 50.000 KM;
- e) da li porezni obveznik koji se bavi djelatnostima za koje se pretpostavlja da treba imati više izlaznog od ulaznog poreza ima stalno iskazan kredit ili povrat.”

U istom članu iza stava (2) dodaju se novi stavovi (3), (4), (5), (6), (7) i (8), koji glase:

„(3) Nakon provedenog ispitnog postupka iz stava (1) i (2) ovog člana, Grupa za obradu poreznih prijava, sačinjava spiskove obveznika s negativnim poljem 71 s podacima iz PDV prijave i drugih baza podataka koji mogu biti od uticaja na donošenje odluke o odobranju povrata i kredita, s izjašnjenjem o izvršenom ispitnom postupku. Grupa sačinjava zasebne spiskove za velike i ostale porezne obveznike.

(4) Šef Odsjeka za poreze u regionalnom centru saziva i rukovodi sastankom šefova Grupe za reviziju i kontrolu, Grupe za kontrolu velikih poreznih obveznika i Grupe za obradu poreznih prijava, radi analize dostavljenih spiskova.

(5) Nakon izvršene analize dostavljenih spiskova, donosi se konačna odluka o obveznicima koji će biti predmet provjere, ograničene provjere i kontrole. Na istom sastanku se donosi i odluka o vrsti provjere odnosno kontrole i nadležnosti organizacione jedinice.

(6) O izvršenim analizama se vodi zapisnik koji zajedno sa spiskovima potpisuju svi prisutni.

(7) Za obveznike koji nisu izdvojeni za provjeru, ograničenu provjeru i kontrolu provodi se postupak odobravanja povrata.

(8) Ukoliko se postupak provjere, ograničene provjere i kontrole od strane nadležne grupe ne može završiti u rokovima za povrat poreza iz člana 52. Zakona o PDV, Grupa za obradu poreznih prijava donosi zaključak o prekidu postupka povrata do okončanja provjere, ograničene provjere i kontrole.”

Član 2.
(Stupanje na snagu)

Ovo Uputstvo stupa na snagu narednog dana od dana objavljivanja u „Službenom glasniku BiH“, od kada se i primjenjuje.

Broj: 02-2-914-1/10
Datum:14.04.2010. godine

DIREKTOR
Kemal Čaušević